

'Kerk Zonder Naam' KwaZulu-Natal

KERSFEES

PAASFEES

PINKSTERFEES

Pieter Raath



Al gehoor van kreatiewe eksegesi? Wel, hier's een: "KwaZulu" beteken letterlik "by" of "in die bo-plek". Korrek vertaal: "In die hemel."

"Natal" verwys na die Portugese wat op Kersdag die Durbanse hawe, voor dit Durban was, binnegevaar het en dit gedoop het tot: "Port Natal", "hawe van die geboorte", "Kersfees"!

So, vry vertaal, sou KwaZulu-Natal kon beteken: "Ons is in die hemel as gevolg van Kersfees." Maar daar kom mos nie 'n punt na Kersfees nie. Daar is 'n Lydensweg en Paasfees, maar ook Hemelvaart en Pinksterfees.

Nou as dit die *explicatio* is, hoe klink die *applicatio* in KZN in April 2007? Dit klink na iets soos: "Met Kersfees verby beleef ons reeds iets van die hemel in ons blyplek. Maar daar is ook die lyding en oorwinning van Pase. So, al is daar nog klippers en slaggate in die pad, wink daar steeds die oorwinning van Paas- en Pinksterfees."

As voorgereg op die kerkherenigingspad

deur KZN was daar ons besoek aan aMajuba. Dit was "great" by 'n ring waar lidmate onder andere vra: "Hou ons meer op die hoogte van wat die Here in sy Woord vra oor ons een-wees met ander. Ons wil gehoorsaam doen."

Toe was daar, voor ons deur die poorte van Achterbergh is, 'n hemelse ontmoeting voor Kersfees. Dit was die ontmoeting van die RCA, VGKSA en NGK se Moderature (hier is nie 'n NGKA in KZN nie). Dit was ons gewone halfjaarlikse ontmoeting. Hier is gedagtes rondgegooi van "kom ons drie kerke gaan met 'n verklaring op skrif na 'agter die berge'. Kom ons gaan met een stem as KZN." En tog kon ons gaan sonder om mekaar se hande, voete of monde te bind met die bereidheid om na mekaar se drome en nagmerries te luister, en veral met die bereidheid om mekaar te vertrou - sáám soekend na God se wil in sy Woord. So is ons saam deur die poorte van Achterbergh, en so het ons saam teruggekom.

En daar staan ons toe soos die Posman uit Patmos met 'n briefie aan sewe stopplekke in KZN, "die hemelse plek as gevolg van Kersfees": Vryheid, Empangeni, Port Shepstone, Kokstad, Durban, Ladysmith en Pietermaritzburg.

Ek het nog nie die Posman uit Patmos se rapport onder oë gehad nie. Maar so kon ons al in 2006 uit KwaZulu-Natal rapporteer: "Ons het ietsie van die hemel ervaar,

kort voor Kersfees al.”

Dis nou kort voor Pase en ons drie kerke in KZN het weer saam gekuier. En hier in Lydenstyd kon ons reeds iets van die oorwinning smaak. Ons drie kerke in KZN het net gevoel ons wil mekaar onder geen omstandighede met enige voorwaardes bind nie, en ons wil op elke gebied na mekaar luister. Die gesprek gaan voort. Ons is lief vir mekaar.

Natuurlik sê ons eenheidspad hoege-naamd nie dat ons eenders is nie. En oral is daar klippe in die pad waarby ons moet verbyskuur en gate wat ons moet opvul. Klippe en gate soos:

☞ Belhar-belydenis.

☞ Vrees vir politieke druk en gediens-tigheid.

☞ Vrees vir verlies van taal, identiteit, kultuur, eiendom.

☞ Persberigte oor en uitsprake van kerk-leiers.

Maar ten spyte van hierdie gate wat op-gevol en klippe wat verwyder moet word, buig ons saam gehoorsaam voor sy Woord - sodat dit waarlik en permanent Pinkster sal word in KwaZulu-Natal.

Tong in die kies: Totdat die nuwe kerk besluit op 'n nuwe naam, noem ons dit sommer KZN: “Kerk Zonder Naam”!

Pieter Raath



Van bl 10

Getuies uit die Gariep Dam

swart, wit en bruin Christene wat Afrikaans praat, aanbid in groter getalle elke Sondag saam. So wend ons die kerk se middele en energie meer doeltreffend aan.

’n Besondere gebeurtenis het vier jaar gelede plaasgevind toe 200 lidmate van die VG Kerk hulle lidmaatskap opgesê het en by die NG Kerk om lidmaatskap aansoek gedoen het. Die proses was nie maklik of sonder probleme nie, maar vandag pluk ons die vrugte daarvan. Ons is één gemeente met één kerkraad. Ons leer van mekaar en verryk mekaar. Ons les ons dors by dieselfde bron, in een gemeente, by een Hemelse Vader.

Ons wil slegs kerk wees en nie ’n voertuig vir Afrikaner-politiek nie. Ons het baie foute gemaak. Ons bely dit. Die NG Kerk hier begin sy geloofwaardigheid herwin. Ons swaai nie meer die septer nie, ons dien in liefde en selfverloëning. Ons is ’n kerk vir alle mense. Vir ons is kerkvereniging nie ’n issue nie. Dit is ’n opdrag. Die proses is aan die gang.

God gee die NG Kerk met al sy foute

van die verlede weer ’n kans in hierdie land. Is dit nie ’n wonderwerk nie! God het die mag om die NG Kerk te tem en om struikelblokke uit die weg te ruim. Ons moet hierdie geleentheid met albei hande aangryp. Ons kan die kerk aan die suidpunt van Afrika wees wat God oorspronklik vir ons bedoel het om te wees.

Dan sal elke gemeente in ons kerk weer ’n plek word waar alle mense hulle dors kan gaan les en gesond kan word, soos Openbaring 22:1-2 vertel van die kerk in die hemel:

“Toe het die engel my die rivier met die water van die lewe gewys. Dit is helder soos kristal en dit stroom uit die troon van God en van die Lam uit. Tussen die hoofstraat van die stad aan die een kant en die rivier aan die ander kant staan die boom van die lewe. Hy dra twaalf keer per jaar vrugte: elke maand lewer hy sy vrugte. Die blare van die boom bring genesing vir die nasies.”

Willie van der Hoven